



Politička organizacija građana "Naša stranka"
Branilaca Sarajeva 5/1, 71 000 Sarajevo
Telefon: 033 408 888; Fax: 033 408 881
E-mail: nasastranka@nasastranka.ba
Web: www.nasastranka.ba

732
Bosna i Hercegovina
Federacija Bosne i Hercegovine
KANTON SARAJEVO

PRIMLJENO: 17-05-2017			
Organizaciona jedinica	Klasifikaciona oznaka	Redni broj	Broj priloga
01			

AMANDMANI

Sarajevo, 17.05.2017.

Sabina Ćudić
Zastupnica u Skupštini Kantona Sarajevo
Naša stranka

Dostaviti:
Vlada Kantona Sarajevo
Skupština Kantona Sarajevo
Ministarstvo za obrazovanje, nauku i mlade Kantona Sarajevo
n/r predsjedavajuća Skupštine Kantona Sarajevo Ana Babić ✓

PREDMET: AMANDMANI NA PRIJEDLOG ZAKONA O VISOKOM OBRAZOVANJU U KANTONU SARAJEVO

Poštovani,

U skladu sa članovima 151. i 152. Poslovnika Skupštine Kantona Sarajevo, kao ovlašteni predlagač - zastupnica Naše stranke u Skupštini Kantona Sarajevo dostavljam slijedeće amandmane na Prijedlog zakona o visokom obrazovanju u Kantonu Sarajevo.

Amandmani su dostavljeni 17.05.2017., blagovremeno i u skladu sa Poslovníkom.

Tražim da se Skupština Kantona Sarajevo očituje o predloženim amandmanima u okviru tačke koja će razmatrati ovaj Prijedlog.

Amandmane dostavljam u prilogu ovog dokumenta.

S poštovanjem,

Sabina Ćudić
Zastupnica u Skupštini Kantona Sarajevo
Naša stranka

Na osnovu člana 151. i 152. Poslovnika Skupštine Kantona Sarajevo, kao ovlašteni predlagač
- zastupnica Naše stranke u Skupštini Kantona Sarajevo, upućujem sljedeće amandmane:

AMANDMANE NA PRIJEDLOG ZAKONA O O VISOKOM OBRAZOVANJU U KANTONU SARAJEVO

AMANDMAN I

Iza člana 23. dodaje se novi član 23a. i glasi:

“Član 23a

(Dokumenti potrebni za sticanje licence visokoškolske ustanove)

(1) Visokoškolske ustanove, u postupku licenciranja, Ministarstvu dostavljaju sljedeću dokumentaciju:

- a) rješenje o registraciji,
- b) studijske programe i kurikulume,
- c) dokaze o ispunjenosti uvjeta utvrđenih Standardima i normativima,
- d) dokaz o raspoloživim finansijskim sredstvima izdat od odgovarajuće banke.

(2) Ministarstvo donosi odluku o dodjeli i/ili odbijanju licence u roku od tri mjeseca od podnošenja zahtjeva visokoškolske ustanove.

(3) Ministarstvo će odbiti zahtjev za izdavanje licence ukoliko dostavljena dokumentacija od strane visokoškolske ustanove ne zadovoljava uvjete iz stava (1) ovog člana.

(4) Ukoliko je zahtjev za izdavanje licence odbijen, visokoškolska ustanova može podnijeti novi zahtjev nakon isteka perioda od godinu dana.

(5) Izdata licenca može biti oduzeta u sljedećim slučajevima:

- a) prestanka rada visokoškolske ustanove;
- b) isteka perioda u vezi sa otklanjanjem nepravilnosti.

(6) Rješenje doneseno u skladu sa st. (2), (3), (4) i (5) ovog člana je konačno, ali se protiv takvog rješenja može tužbom pokrenuti upravni spor na način i pod uvjetima predviđenim zakonom.“

OBRAZLOŽENJE

Potrebno je precizirati dokumenti koje predstavljaju osnov za pokretanje postupka licenciranja visokoškolskih ustanova, posebno u smislu uslova vezanih za odbijene zahtjeve za izdavanje licence i konsekvencama istog.

AMANDMAN II

Član 40. se mijenja i glasi:

- „(1) Univerzitet može organizirati studij za sva tri ciklusa studija u saradnji sa domaćom ili stranom visokoškolskom ustanovom.
- (2) Visoka škola može organizirati studij prvog ciklusa studija u saradnji sa domaćom ili stranom visokoškolskom ustanovom.
- (3) Na zahtjev organizacione jedinice univerzitet može dati saglasnost da jedna ili više organizacionih jedinica organizira multidisciplinami i/ili interdisciplinarni studij.
- (4) Na individualni zahtjevi studenta univerzitet može dati saglasnost da jedna ili više organizacionih jedinica organizira multidisciplinami i/ili interdisciplinarni studij za treći ciklus.
- (5) U organiziranju studija iz st. (1) i (2) ovog člana, visokoškolska ustanova može realizirati program za sticanje dvojnih ili zajedničkih diploma.
- (6) Institut kao organizaciona jedinica visokoškolske ustanove kao javne ustanove može u saradnji sa domaćom ili inostranom visokoškolskom ustanovom odnosno organizacionom jedinicom uz saglasnost univerziteta organizirati III ciklus studija, a može biti suorganizator II ciklusa studija na način i pod uslovima utvrđenim Statutom.
- (6) Za realizaciju studija iz ovog člana, visokoškolska ustanova je obavezna, uz prethodno mišljenje senata.
- (7) Cijenu studija iz stava (6) ovog člana koji realizira jedna ili više organizacionih jedinica visokoškolske ustanove kao javne ustanove utvrđuje posebnom odlukom visokoškolska ustanova.
- (8) Osnivač visokoškolske ustanove kao ustanove cijenu studija iz stava (6) ovog člana utvrđuje na način i pod uslovima utvrđenim statutom visokoškolske ustanove, i o toj cijeni obavještava Ministarstvo.“

OBRAZLOŽENJE

Ovim izmjenama ciljano želimo da ostvarimo mogućnost da studenti koji upišu doktorske studije mogu tražiti od univerziteta multidisciplinarni ili interdisciplinarni program koji najviše odgovara njihovom usavršavanju. Naprimjer, ukoliko se neko bavi i stručan je u menadžmentu u zdravstvu te ima želju da završi III ciklus studija koji bi se ticao ove oblasti, može tražiti organizovanje takvog interdisciplinarnog/multidisciplinarnog studija, a koji bi onda obuhvatao nastavu iz oblasti relevantnih za ovakav studij u organizaciji kadrova koje obezbjeđuje univerzitet samostalno ili u saradnji sa drugom domaćom ili stranom visokoškolskom ustanovom. Naravno, s obzirom da univerzitet ima pravo da prihvati ili odbije uz adekvatnu argumentaciju smatramo da ovo nije problematično polje a svjetski univerziteti već odavno imaju zastupljenu praksu ovakvih programa. Druga izmjena ovog člana se prvestveno tiče da dupla potvrda vezana za ove programe nije potrebna te da je dovoljno odobrenje od strane Senata univerziteta, a ne i Ministarstva.

AMANDMAN III

U članu 44. dodaje se stav (3) i glasi:

„Ministarstvo je dužno u roku od 6 mjeseci od stupanja na snagu ovog zakona, donijeti Pravilnik o ekvivalenciji.“

OBRAZLOŽENJE

Ovim pravilnikom će se regulisati ukoliko dođe do velikih promjena u studijskom programu. Moži će se adekvatno vršiti izjednačavanja studenata bolonjskog studija sa studentima starog sistema. Samim time olakšat će se efikasnija primjena ovog zakona.“

AMANDMAN IV

Član 52. se briše.

OBRAZLOŽENJE

Smatramo da je potpuno neprihvatljivo da Skupština Kantona kao i dokumenti koje ista donosi imaju bilo kakve efekte na sistem visokog obrazovanja, odnosno ne vidimo na koji način smjernice donesene na Skupštini mogu biti relevantne pored svih drugih institucija koje se bave akademskim usavršavanjima odnosno normama visokog obrazovanja.

AMANDMAN V

Član 53. stav (6) se mijenja i glasi :

„(6) Nakon stupanja na snagu ovog zakona, rektor licencirane i akreditovane visokoškolske ustanove sa područja Kantona je dužan jednom u dvije godine dostaviti Ministarstvu pisanu informaciju o poziciji koju visokoškolska ustanova zauzima na relevantnim međunarodnim sistemima za rangiranje visokoškolskih i istraživačkih ustanova, kao i o aktivnostima koje će u saradnji sa rukovodiocima organizacionih jedinica preduzeti kako bi se poboljšala i unaprijedila pozicija visokoškolske ustanove u okviru međunarodnih rang lista visokog obrazovanja.“

OBRAZLOŽENJE

Prethodno zakonsko riješenje je bilo usmjereno na godišnjim izvještajima koje bi univerzitet bio dužan da podnosi jednom godišnje, smatramo da je dati izvještaj neophodan kako bi se mogao pratiti napredak univerziteta, međutim smatramo da je ovaj godišnji izvještaj pretjerano birokratiziranje, te da je realan rok od dvije godine u kojem se može pratiti rast ili pad univerziteta na datim međunarodnim rang listama. Ovako se smanjuje teret i pritisak na univerzitete, međutim i dalje im ostaje obaveza podnošenja datih izvještaja kako bi Ministarstvo moglo lakše pratiti rast univerziteta sa međunarodnim standardima.

AMANDMAN VI

U članu 66. mijenja se naziv „Prava studenata sa posebnim potrebama“ i glasi:
„Prava studenata sa poteškoćama u razvoju i osoba s invaliditetom“

U istom članu u stavu (1) i (2) mijenjaju se riječi „studentima sa posebnim potrebama“ u „studentima sa poteškoćama u razvoju i osobama s invaliditetom“.

OBRAZLOŽENJE

Osobe sa posebnim potrebama je nekorektan termin i nije usklađen sa standardima termina koji se tiču ostvarivanja prava osoba sa invaliditetom.

AMANDMAN VII

U članu 85. u stavu (1) brišu se riječi „ originalna dokumenta“

U istom članu dodaje se stav (5) i glasi:

„Ukoliko kandidat sa preliminarnog rang – liste bude primljen na organizacionu jedinicu druge visokoškolske ustanove, za koju se također prijavio, u roku od 6 dana nakon objavljene preliminarnog rang – liste iz stava (2) ovog člana dužan je da izjavom u pismenom obliku obavijesti organizacionu jedinicu visokoškolske ustanove da više nije kandidat za upis na ovu organizacionu jedinicu visokoškolske ustanove.“

U istom članu stav (7) se mijenja i glasi:

„Konačnu rang – listu upisanih studenata u svim statusima, visokoškolska ustanova/organizaciona jedinica je obavezna objaviti na oglasnoj ploči najkasnije 2 dana nakon isteka roka za donošenje odluke po izjavljenom prigovoru i izjave o povlačenju sa rang – liste iz stava (4)a ovog člana. Rukovodilac visokoškolske ustanove je obavezan Ministarstvu dostaviti spisak svih upisanih studenata u prvu godinu studija na nivou visokoškolske ustanove najkasnije sedam dana prije početka studijske godine.“

U istom članu dodaje se stav (6) i glasi:

„Nakon objavljivanja konačnog rang – liste upisanih studenata u svim statusima, prilikom upisa na visokoškolsku ustanovu/organizacionu jedinicu primljeni kandidat predaje originalna dokumenta.“

Dosadašnji stavovi (5), (6) i (7) postaju (7) i (8) i (9)

U istom članu briše se stav (8) i (9).

OBRAZLOŽENJE

U dosadašnjoj praksi onemogućavalo se kandidatima za upis u prvu godinu studija da izaberu više studija i na njih se prijave zbog predaje originalnog dokumenta prilikom prijave na konkurs. Problem koji je nastajao u slučajevima kada kandidat nije primljen na jedan studij nema pravo da se upiše na drugi studij do objavljivanja konkursa naredne godine. Ovim rješenjem ukinula bi se takva praksa i omogućilo kandidatima da se prijave na više studija. Rokom od 6 dana kandidati bi bili ograničeni da svoju odluku objave visokoškolskoj ustanovi/organizacionoj jedinici kako bi se oslobodilo mjesto za ostale kandidate.

AMANDMAN VIII

U članu 106. u stavovima (1), (2), (3) i (6) brišu se riječi „domaćih i međunarodnih“.

OBRAZLOŽENJE

Ovaj član je potrebno korigovati u smislu da se umjesto pojma „međunarodnih baza podataka“ koristi pojam „relevantne naučne baze podataka“. Definicijom kakva stoji u trenutnom prijedlogu zakona u čl. 106. u praksi moglo bi značiti isključivanje vrlo značajnih regionalnih i nacionalnih baza podataka. Potrebno je bazu podataka uspostaviti na osnovu objektivnih kriterija i time uspostaviti relevantnost kao glavni kriterij a ne domaću ili međunarodnu komponentu.

AMANDMAN IX

U članu 108. briše se stav (7).

OBRAZLOŽENJE

Prijem u radni odnos ili angažman neakadenskog osoblja ne spada u član koji reguliše izbor u akademska zvanja i izbor člana akademskog osoblja. Smatramo da je potreban novi član.

AMANDMAN X

Dodaje se član 108a i glasi:

„Član 108a

(Prijem u radni odnos ili angažman neakadenskog osoblja)

Prijem u radni odnos ili angažman neakadenskog osoblja na organizacionoj jedinici može se vršiti isključivo uz prethodno pribavljenu pisanu saglasnost rektora koja se daje nakon što se utvrdi nemogućnost preraspodjele raspoloživog kadra u okviru visokoškolske ustanove.“

OBRAZLOŽENJE

Prijem u radni odnos ili angažman neakadenskog osoblja ne spada u član koji reguliše izbor u akademska zvanja i izbor člana akademskog osoblja. Iz tog razloga smatrali smo da je potreban novi član koji reguliše prijem u radni odnos ili angažman neakadenskog osoblja.

AMANDMAN XI

U članu 109. stav (1) se mijenja i glasi:

„(1) Visokoškolska ustanova može da angažira akademsko osoblje sa druge nacionalne ili međunarodne visokoškolske ustanove.“

U istom članu stav (1) alineja a) i b) se brišu.

U istom članu stav (2) se mijenja i glasi:

„(2) Visokoškolska ustanova može u skladu sa stavom (1) ovog člana angažovati člana akademskog osoblja koji se nalazi u radnom odnosu kod drugog poslodavca koji nije visokoškolska ustanova, pod uslovom da mu nije istekao period izbora u zvanje na visokoškolskoj ustanovi na kojoj je izvršen izbor i uz prethodno pribavljenu saglasnost nadležnog organa poslodavca.“

OBRAZLOŽENJE

Potrebno je u članu 109. definisati da je moguće angažovati i profesore koji dolaze sa univerziteta drugih zemalja tzv. gostujući profesori. Ovo je posebno važno radi promocije mobilnosti nastavnog osoblja i međunarodne saradnje u oblasti visokog obrazovanja kao i stručnog usavršavanja studenata. Ovakvo rješenje doprinosi boljem izvođenju nastavno - naučnog procesa. Potpuno je neprihvatljivo propisivati uslove u kojima se gostujući profesori mogu angažovati samo ukoliko se na raspisani konkurs za izbor člana akademskog osoblja nije prijavio nijedan kandidat ili po provedenom konkursu nije izabran nijedan od prijavljenih kandidata, te ukoliko je član akademskog osoblja koji je u radnom odnosu na matičnoj organizacionoj jedinici visokoškolske ustanove dao ili dobio otkaz ili bio suspendiran i to dok se u konkursnom postupku ne izabere novi član akademske zajednice. Ovo onemogućava mobilnost profesora, nije u skladu ni sa principima modernog evropskog i svjetskog obrazovanja i zatvara visokoškolsko obrazovanje u Kantonu Sarajevo u krug cirkulacije istih kadrova i stagnaciju razvoja boljeg i savremenijeg nastavno – naučnog procesa.

AMANDMAN XII

U članu 151. stav (2) se mijenja i glasi:

„Na prijedlog senata visokoškolske ustanove kao javne ustanove i upravnog odbora visokoškolske ustanove kao javne ustanove, Vlada utvrđuje školarinu koju su obavezni plaćati studenti koji sami snose troškove studija u svim statusima i svim ciklusima studija.“

U istom članu stav (5) se mijenja i glasi:

„Postupak koji prethodi utvrđivanju prijedloga odluke od strane senata i upravnog odbora preciznije se uređuje statutom.“

OBRAZLOŽENJE

Da bi rješenje bilo konzistentno i u skladu sa stavom (1) potrebno je izmijeniti stav (2), te kao i u stavu (1) odrediti da o školarini i u stavu (2) odlučuje Vlada. Posebno je ovo važno jer je upravo Vlada ta koja je i u nedavnim događajima zaustavila visoškolske ustanove da imaju nerealne iznose školarina za standard života u BiH i uslove koje nude na svojim organizacionim jedinicama.

AMANDMAN XIII

Dodaje se član 174a i glasi:

„Član 174a
(Ustanove za posredovanje u zapošljavanju)

Redovni studenti imaju pravo na posredovanje u zapošljavanju preko pravnih lica čija djelatnost osigurava cjelovitost i potrebni standard sistema visokog obrazovanju.

Način i uslovi posredovanja u zapošljavanju utvrđeni su **Pravilnikom o posredovanju pri zapošljavanju redovnih studenata** koji donosi ministar 90 dana od dana stupanja na snagu ovog Zakona.“

OBRAZLOŽENJE

Ovim članom se uređuje pitanje zapošljavanja redovnih studenata za vrijeme studiranja i uspostava ustanova / pravnih lica koja će regulirati posredovanje u zapošljavanju i ispunjavanje prava i obaveza prema državi, kao i sprečavanje malverzacija sa olakšicama koje se tiču zapošljavanja studenata.

AMANDMAN XIV

Dodaje se član 174b koji glasi:

„Član 174.b
(Naučno-tehnološki parkovi)

Naučno-tehnološki park je privredno društvo koje se osniva radi komercijalizacije naučnih rezultata i podsticanja saradnje naučnika i privrednika.

Saglasnost za korištenje naziva naučno-tehnološki park daje Ministar.

Naučno-tehnološki park uživa pogodnosti kojim se podstiče ostvarivanje njegovih ciljeva, a u skladu sa Zakonom.

Status naučno-tehnološkog parka i pogodnosti koje uživa uređuju se **Pravilnikom o naučno-tehnološkim parkovima** koji donosi ministar 90 dana od dana stupanja na snagu ovog Zakona.“

OBRAZLOŽENJE

Ovim članom se dodaje mogućnost formiranja nove forme privredno-naučnog organizovanja unutar sistema visokog obrazovanja, a koje će omogućiti ulaganja u nauku i obrazovanje, te direktnu privrednu korist za Kanton Sarajevo.

Tražim da se predloženih 14 amandmana dostavi zastupnicima Skupštine Kantona Sarajevo, kao i predlagaču – Vladi Kantona Sarajevo.



Sabina Čudić
Zastupnica Naše stranke
Skupština Kantona Sarajevo

